

৯ম জাতীয় সংসদ নির্বাচন ২০০৮  
জাতীয় সমাজতান্ত্রিক দল-জাসদ এর  
নির্বাচনী ইশতেহার

পরিবর্তনের প্রচেষ্টা

প্রিয় দেশবাসী,

সংগ্রামী সালাম ও শুভেচ্ছা গ্রহণ করুন। আগামী ২৯ ডিসেম্বর ২০০৮ জাতির বহুল প্রচারিত জাতীয় সংসদ নির্বাচন অনুষ্ঠিত হতে যাচ্ছে। এ নির্বাচনের জন্য সংবিধান অনুযায়ী নির্ধারিত সময়ের পরও জনগণকে অতিরিক্ত দুই বছর অপেক্ষা করতে হয়েছে। বিগত বিএনপি-জামাত জোট সরকার ক্ষমতা চিরস্থায়ী করার জন্য নীল নকশা করেছিল। তাদের এই নীল নকশা অনুযায়ী ‘ইয়াজউদ্দিন তত্ত্বাবধায়ক সরকার’ ও ‘আজিজ নির্বাচন কমিশন’ ২০০৭ সালের ২২ জানুয়ারি একটি একতরফা নির্বাচনের অপচেষ্টা চালিয়েছিল। কিন্তু জনগণ ভোটের অধিকার রক্ষা এবং বিএনপি-জামাতের ক্ষমতা চিরস্থায়ী করার নীল নকশার একতরফা নির্বাচনের বিরুদ্ধে তীব্র গণআন্দোলন গড়ে তোলে। গণআন্দোলনের মুখে ২০০৭ সালের ১১ জানুয়ারি ‘ইয়াজউদ্দিন তত্ত্বাবধায়ক সরকার’ ক্ষমতা ছাড়তে এবং ২২ জানুয়ারি নীল নকশার একতরফা নির্বাচন বাতিল করতে বাধ্য হয়। ‘ফখরুদ্দীন তত্ত্বাবধায়ক সরকার’ দায়িত্ব গ্রহণ করে নির্বাচন কমিশন পুনর্গঠন করে। নতুন নির্বাচন কমিশন খুব ধীর গতিতে হলেও ছবিসহ ভোটার তালিকা প্রণয়ন, নির্বাচনী আইন ও আচরণ বিধি যুগোপযোগী করাসহ নির্বাচন অনুষ্ঠানের পদ্ধতিমূলক কাজগুলো সম্পন্ন করে। তত্ত্বাবধায়ক সরকার নির্বাচনকে কালো টাকা ও পেশি শক্তির অশুভ প্রভাবমুক্ত করার জন্য দুর্নীতিবাজ-লুটেরা-কালো টাকার মালিক-সন্ত্রাসীদের বিরুদ্ধে অভিযান শুরু করে। কিন্তু সরকারের এ অভিযান দু’বছরের মাথায় আজ অনেকটাই ব্যর্থ ও প্রহসনে পরিণত হয়েছে। তত্ত্বাবধায়ক সরকার ‘মুখ ও দল না দেখে’ আইনের নিরপেক্ষ ও কঠোর প্রয়োগের বদলে ‘সমতা রক্ষা’ করতে গিয়ে সমগ্র দুর্নীতিবিরোধী অভিযানকে প্রশ্নবিদ্ধ করে ফেলে। তত্ত্বাবধায়ক সরকার প্রশাসন, দুর্নীতি দমন কমিশন চিহ্নিত দুর্নীতিবাজদের বিরুদ্ধে অভিযান সফল করার জন্য যথাযথ আইনি প্রস্তুতি গ্রহণ ও আইনি প্রক্রিয়া অনুসরণ না করাসহ প্রশাসনিক ব্যর্থতার ফলে দুর্নীতিবাজদের বিরুদ্ধে আইনি লড়াই দুর্বল হয়ে পড়ে। সরকার, প্রশাসন ও দুদকের এই ব্যর্থতার সুযোগ নিয়ে আইনের ফাঁকফোকর দিয়ে চিহ্নিত লুটেরা-সন্ত্রাসী-দুর্নীতিবাজ-কালো টাকার মালিকরা বেরিয়ে এসে নির্বাচনের মাঠে ঢুকে পড়েছে।

সমগ্র জাতি আশা করেছিল, ২০০৭ সালের ১১ জানুয়ারির পূর্বাপর পরিস্থিতি বিবেচনায় এনে এবং জনগণের আকাঙ্ক্ষাকে ধারণ করে রাজনৈতিক নেতৃত্ব পুরোনো রাজনৈতিক সংস্কৃতি থেকে কিছুটা হলেও বেরিয়ে আসবেন। নিজেদের কিছুটা হলেও পরিবর্তন করবেন। যত নির্মমই হোক না কেন রাজনৈতিক নেতৃত্ব চিহ্নিত দুর্নীতিবাজ-লুটেরা-সন্ত্রাসী-জঙ্গিবাদী অপরাধীদের সাথে সকল সম্পর্কের ছেদ ঘটাতে। কিন্তু দুর্ভাগ্যজনক হলেও সত্য যে, সরকারের ব্যর্থতা ও আইনের ফাঁকফোকর গলিয়ে বেরিয়ে আসা চিহ্নিত দুর্নীতিবাজ-লুটেরা-সন্ত্রাসীদের অনেকেই রাজনৈতিক দলের মনোনয়ন পেয়ে নির্বাচনের মাঠে ঢুকে পড়েছে। বিশেষ করে বিএনপি ও চার দল অত্যন্ত নগ্নভাবে এই চিহ্নিত লুটেরা-সন্ত্রাসী-অপরাধীদের মনোনয়ন দিয়ে পুরস্কৃত করেছে। এ রকম পরিস্থিতিতে আগামী ২৯ ডিসেম্বর ৯ম জাতীয়

সংসদ নির্বাচন অনুষ্ঠিত হতে যাচ্ছে। ফলে এ নির্বাচনে সমগ্র দেশবাসী ও ভোটারদের সামনে মূল প্রশ্ন: দেশে আবারও দুর্নীতিবাজ-লুটেরা-সন্ত্রাসী-জঙ্গিবাদী অপরাধীদের রাজত্ব কায়েম হবে, নাকি পরিবর্তনের পথে টেকসই গণতন্ত্র, আইনের শাসন, সুশাসন, উন্নয়ন ও শান্তির পথে পরিচালিত হবে? দুর্নীতিবাজ-লুটেরা-সন্ত্রাসী-জঙ্গিবাদী-অপরাধীদের প্রধান পৃষ্ঠপোষক বিএনপি-জামাত আবারও ক্ষমতায় আসবে, নাকি বিএনপি-জামাত জোট সরকারের দুঃশাসন বিরোধী গণআন্দোলনের ধারাবাহিকতায় গণতান্ত্রিক অসাম্প্রদায়িক শক্তির নেতৃত্বে পরিবর্তনের শক্তি সরকার গঠন করবে?

প্রিয় দেশবাসী,

জাতীয় সমাজতান্ত্রিক দল-জাসদের রক্তঝরা সংগ্রামী ইতিহাস আপনাদের জানা। দেশ ও জনগণের জন্য কোন রাজনৈতিক দলের নেতা-কর্মীদের এত বিপুল পরিমাণ রক্তদান, জীবনদান, আত্মত্যাগ, অত্যাচার-নির্যাতন সহ্য করার ঘটনা বিরল। জাতীয় সমাজতান্ত্রিক দল-জাসদ কখনোই কোন পরিস্থিতিতেই এক মুহূর্তের জন্যও দেশ ও জনগণের স্বার্থের বিষয়ে আপস করেনি। আজও জাতীয় সমাজতান্ত্রিক দল-জাসদ সেই সংগ্রামী ঐতিহ্যকে ধারণ করেই দেশ ও জনগণের বৃহত্তর স্বার্থকে উর্ধ্ব তুলে ধরে সংগ্রামের অংশ হিসাবেই ৯ম জাতীয় সংসদ নির্বাচনে অংশগ্রহণ করছে।

প্রিয় দেশবাসী,

জাতীয় সমাজতান্ত্রিক দল-জাসদ মনে করে, বিএনপি-জামাত জোটের রাজনৈতিক নীতিগত অবস্থানই স্বাধীনতা সংগ্রাম ও মুক্তিযুদ্ধের চেতনা তথা বাংলাদেশ রাষ্ট্রের ভিত্তির চেতনা বিরোধী, বিএনপি-জামাত জোট নগ্নভাবেই ‘উদার ও মুক্ত গণতন্ত্র’-এর সর্বজনীন ধারণা ও চেতনাবিরোধী শক্তি। তাই বিএনপি-জামাত জোট দেশ ও জনগণের জন্য একটি বিপদ। এ বিবেচনা থেকেই ২০০১ সালে বিএনপি-জামাত জোট সরকার ক্ষমতায় এসেই যে দুঃশাসন-দলবাজি-ক্ষমতাবাজি-লুণ্ঠন-দুর্নীতি-জঙ্গিবাদী রাজত্ব কায়েম করেছিল জাসদ তার বিরুদ্ধে ঐক্যবদ্ধ গণআন্দোলন গড়ে তোলার প্রচেষ্টা নেয়। জাসদের প্রচেষ্টার ফলেই অসাম্প্রদায়িক গণতান্ত্রিক শক্তির সমন্বয়ে ১৪ দলীয় জোট এবং পরবর্তীতে বিএনপি-জামাতের দুঃশাসন ও জঙ্গিবাদবিরোধী অন্যান্য রাজনৈতিক দল নিয়ে মহাজোট গঠিত হয়। জাসদ সেই বৃহত্তর ঐক্যের ধারায়ই ১৪ দল ও মহাজোটের শরিক হিসাবে আসন্ন জাতীয় সংসদ নির্বাচনে অংশগ্রহণ করছে। জাতীয় সমাজতান্ত্রিক দল-জাসদ মনোনীত প্রার্থীরা ৪টি নির্বাচনী এলাকায় ১৪ দল ও মহাজোটের প্রার্থী হিসাবে প্রতিদ্বন্দ্বিতা করছে এবং বাকি ২৯৬টি আসনে ১৪ দল ও মহাজোট মনোনীত প্রার্থীদের পক্ষে সক্রিয় সমর্থন প্রদান করেছে ও ভূমিকা রাখছে। জাতীয় সমাজতান্ত্রিক দল-জাসদ মনোনীত প্রার্থীরা জনগণের ভোটে সংসদ সদস্য নির্বাচিত হলে পরিবর্তনের প্রচেষ্টা হিসাবে অগ্রাধিকার ভিত্তিতে যে ভূমিকা পালন করবে, তা হোল:

পরিবর্তনের প্রচেষ্টা **উভভড়ৎঃ ভড়ৎ ঈযধহমব**

## □ জাতীয় সরকার ও ন্যূনতম জাতীয় কর্মসূচি

জাসদ দলীয় সংসদ সদস্যগণ অসাম্প্রদায়িক গণতান্ত্রিক শক্তির সমন্বয়ে একটি ন্যূনতম জাতীয় কর্মসূচির ভিত্তিতে একটি জাতীয় সরকার গঠনের উদ্যোগ গ্রহণ করবে এবং সেই সরকারে অংশগ্রহণ করবে।

## □ সরকার পরিচালনায় ভারসাম্য, রাষ্ট্রীয় নীতি নির্ধারণে জনআকাঙ্ক্ষার প্রতিফলন

জাসদ সরকার গঠনে ভূমিকা রাখলে সরকারের ভিতরে শ্রমিক-কর্মচারী-কৃষক-নারীর পক্ষে ভারসাম্য সৃষ্টি, সরকারের নীতি নির্ধারণে জনআকাঙ্ক্ষার প্রতিফলন ঘটানো, বিশেষ করে শ্রমিক-কর্মচারী-কৃষক-

কৃষি শ্রমিক-শ্রমজীবী-কর্মজীবী-পেশাজীবী-মেহনতি মানুষ-কৃষি ও শিল্পে দেশীয় উদ্যোক্তা ও বিনিয়োগকারী-নারী-ধর্মীয় ও জাতিগত সংখ্যালঘু, আদিবাসীসহ সমাজের শোষিত বঞ্চিত পিছিয়ে পড়া জনগোষ্ঠীর স্বার্থ রক্ষা করা, সরকারকে জনগণের প্রতি সংবেদনশীল ও গণমুখী রাখার জন্য সার্বক্ষণিক প্রচেষ্টা চালাবে।

### ▣ **দ্রব্যমূল্য নিয়ন্ত্রণ, খাদ্য নিরাপত্তা, দরিদ্র ও স্বল্প আয়ের মানুষ বাঁচাতে রাষ্ট্রীয় সমর্থন**

জাসদ সরকার গঠনে ভূমিকা রাখলে সরকারের ভিতরে প্রথম দিন থেকেই সর্বোচ্চ জাতীয় অগ্রাধিকার ভিত্তিতে বাজারের ওপর জনগণের ভাগ্য ছেড়ে না দিয়ে মানুষ বাঁচাতে নিত্যপ্রয়োজনীয় দ্রব্যমূল্য ও জীবনযাপন ব্যয়ের লাগামহীন উর্ধ্বগতি নিয়ন্ত্রণ করতে সুপরিকল্পিতভাবে রাষ্ট্রীয় হস্তক্ষেপ, নিত্যপ্রয়োজনীয় দ্রব্যসমূহের চাহিদা ও মজুদের পরিমাণ সার্বক্ষণিক নজরদারি ও নিরূপণ করে শুধুমাত্র ব্যবসায়ীদের ওপর নির্ভরশীল না থেকে রাষ্ট্রীয় উদ্যোগে চাহিদামত বিদেশ থেকে আমদানি ও অভ্যন্তরীণ বাজার থেকে সংগ্রহ করে খাদ্য নিরাপত্তা গড়ে তোলার জন্য প্রথম বাজেটেই বরাদ্দ করা, টিসিবিকে সক্রিয় করা, গ্রাম ও শহরে শ্রমিক-কর্মচারী-কৃষি শ্রমিক-নিম্ন আয়ের মানুষ-বস্তিবাসীদের জন্য রেশনিং ব্যবস্থা চালু, ভিজিএফ কার্ডধারীর সংখ্যা বৃদ্ধি, বয়স্ক ও দুস্থ নারীদের জন্য ভাতার সংখ্যা ও পরিমাণ বৃদ্ধি, টেস্ট রিলিফ ও কাজের বিনিময়ে খাদ্য কর্মসূচি সম্প্রসারিত করা, কৃষি উৎপাদন নিরবচ্ছিন্ন রাখা ও বৃদ্ধির জন্য চাহিদামত সার-বীজ-ডিজেলসহ প্রয়োজনীয় কৃষি উপকরণ সরবরাহ নিশ্চিত করতে প্রথম বাজেটেই প্রয়োজনীয় বরাদ্দ রাখা, বিএডিসিকে সক্রিয় করার জন্য সর্বাত্মক প্রচেষ্টা চালাবে।

### ▣ **বিদ্যুৎ উৎপাদন বৃদ্ধি ও জ্বালানি নিরাপত্তা**

জাসদ সরকার গঠনে ভূমিকা রাখলে অগ্রাধিকার ভিত্তিতে বাস্তবোচিত সম্ভাব্য সকল উপায়কে কাজে লাগিয়ে বিদ্যুৎ উৎপাদন বৃদ্ধি, পারমাণবিক বিদ্যুৎ উৎপাদন ও আঞ্চলিক সহযোগিতার ভিত্তিতে জলবিদ্যুৎ উৎপাদনে প্রচেষ্টা চালাবে। জাতীয় সম্পদ গ্যাস-কয়লার ব্যবহার ও বিদ্যুৎ উৎপাদন নিয়ে একটি সমন্বিত জ্বালানি নিরাপত্তা নীতি গ্রহণ ও বাস্তবায়ন করার প্রচেষ্টা চালাবে।

### ▣ **দুর্নীতি মোকাবেলা**

জাসদ সরকার গঠনে ভূমিকা রাখলে দুর্নীতি দমন কমিশনকে লোকবল ও প্রশিক্ষণ দিয়ে শক্তিশালী ও স্বাধীন করা। রাষ্ট্রপতি, প্রধানমন্ত্রী, মন্ত্রী, সংসদ সদস্য থেকে শুরু করে রাজনৈতিক দলের শীর্ষ পর্যায়ের নেতা-নেত্রী, সচিব, সরকারি অধিদপ্তর-পরিদপ্তর-বিভাগ-সেক্টর কর্পোরেশনের প্রধান থেকে শুরু করে শীর্ষ পর্যায়ের সরকারি কর্মকর্তা, সমাজের অন্যান্য ক্ষেত্রের ক্ষমতাবানদের আয়-ব্যয় এবং সম্পদের বিবরণী প্রতিবছর প্রকাশ করা, ক্ষমতার অপব্যবহার ও দুর্নীতির ক্ষেত্র ও উৎসগুলো চিহ্নিত করে সে সকল ক্ষেত্রে বিশেষ নজরদারির ব্যবস্থা করার প্রচেষ্টা চালাবে।

### ▣ **জঙ্গিবাদ দমন**

জাসদ সরকার গঠনে ভূমিকা রাখলে জঙ্গিবাদ ও জঙ্গিবাদী নেটওয়ার্কসমূহ ধ্বংস করে জাতীয় নিরাপত্তা ও জননিরাপত্তা নিশ্চিত করতে অগ্রাধিকার ভিত্তিতে রাষ্ট্রীয় পদক্ষেপ গ্রহণ এবং জঙ্গিবাদবিরোধী আন্তর্জাতিক ও আঞ্চলিক সহযোগিতা জোরদার করার প্রচেষ্টা চালাবে।

### ▣ **স্বচ্ছতা ও জবাবদিহিতা, সুশাসন ও আইনের শাসন**

জাসদ সরকার গঠনে ভূমিকা রাখলে সরকারের স্বচ্ছতা ও জবাবদিহিতা নিশ্চিত করতে সরকারকে সকল বিষয়ে সংসদের কাছে জবাবদিহির ব্যবস্থা নিশ্চিত করা, সংসদের প্রথম অধিবেশনেই সংসদীয়

কমিটিসমূহ গঠন এবং সংসদীয় কমিটিসমূহের প্রকাশ্য গণশুনানির ব্যবস্থা চালু করা, ৭০ ধারা সংশোধন করে সংসদ সদস্যদের স্বাধীন ভূমিকা নিশ্চিত করা, তথ্য অধিকার আইন বাস্তবায়নের মাধ্যমে রাষ্ট্রীয় নীতি নির্ধারণ ও বাস্তবায়নের সকল বিষয়ে জনগণের জানার অধিকার নিশ্চিত করা, সংবিধান ও আইন অনুযায়ী প্রজাতন্ত্রের সকল পর্যায়ের কর্মকর্তা ও কর্মচারীদের নিরপেক্ষ ভূমিকা পালনের পরিবেশ সৃষ্টি এবং প্রশাসনের নিরপেক্ষতা ও কার্যকারিতা নিশ্চিত করা, যত ক্ষমতাবানই হোক না কেন কাউকেই আইনের উর্ধ্ব ওঠার সুযোগ বন্ধ করা এবং সকল মানুষের অধিকার রক্ষা বা অধিকার খর্ব হলে প্রতিকার পাবার ব্যবস্থা করে আইনের শাসন সুনিশ্চিত করার প্রচেষ্টা চালাবে।

### □ আইন-শৃঙ্খলা

আইন শৃঙ্খলা রক্ষায় পুলিশসহ সকল আইন প্রয়োগকারী সংস্থাকে সংবিধান ও আইন অনুযায়ী পরিচালনা করা, স্বাধীনভাবে কাজ করতে দেয়া, এ সকল সংস্থার দক্ষতা ও কার্যকারিতা বৃদ্ধি করা, ফৌজদারি অভিযোগের তদন্ত ও প্রসিকিউশন পৃথক করা, পুলিশ বিভাগ সংস্কার-পুনর্গঠন-শৃঙ্খলা প্রতিষ্ঠা ও কার্যকর করার জন্য পুলিশ কমিশন গঠন করার প্রচেষ্টা চালাবে।

### □ স্থানীয় সরকার শক্তিশালীকরণ

জাসদ সরকার গঠনে ভূমিকা রাখলে ঘোষিত তফসিল অনুযায়ী উপজেলা নির্বাচন অনুষ্ঠান সুনিশ্চিত করা, জেলা পরিষদের নির্বাচন অনুষ্ঠানের জন্য সরকারের তরফ থেকে নির্বাচন কমিশনকে তাগিদ ও সহযোগিতা প্রদান করা, স্থানীয় সরকারের ওপর স্থানীয় সরকার মন্ত্রণালয়সহ মন্ত্রী, এমপি, আমলাদের সকল ধরনের নিয়ন্ত্রণ ও খবরদারি বন্ধ করে স্থানীয় সরকার কমিশনের ওপর স্থানীয় সরকারসমূহকে গতিশীল দায়বদ্ধ ও শক্তিশালী করার সকল দায়িত্ব অর্পণের প্রচেষ্টা চালাবে।

### □ তরুণদের ভবিষ্যৎ নির্মাণ

জাসদ সরকার গঠনে ভূমিকা রাখলে দেশের প্রতিটি তরুণের জন্য নিশ্চিত ভবিষ্যৎ গড়তে জাতীয় ও আন্তর্জাতিক বাজারে প্রতিযোগিতা করার মত মানসম্মত শিক্ষার সুযোগ নিশ্চিত, শিক্ষা শেষে দেশে ও বিদেশে কর্মসংস্থানের ক্ষেত্র বিস্তৃত করা, স্ব উদ্যোগে কর্মসংস্থানের ক্ষেত্র বিস্তৃত করা, যাতে করে প্রতিটি তরুণ যেন বেকার না থাকে এবং জাতীয় উন্নয়ন, সমাজ ও পরিবারের জন্য অবদান রাখার সুযোগ নিশ্চিত হয়।

### □ শিক্ষা

জাসদ সরকার গঠনে ভূমিকা রাখলে শিক্ষা ব্যবস্থার নিম্নমান-নৈরাজ্য-বিশৃঙ্খলা-বিপর্যয়-সংকটকে জাতীয় জরুরি অবস্থা হিসাবে সর্বোচ্চ গুরুত্ব ও অগ্রাধিকার প্রদান করে শিক্ষা ব্যবস্থা পুনরুদ্ধারে জাতীয় জরুরি পদক্ষেপ গ্রহণ করা, জাতীয় সংসদে আলোচনা এবং শিক্ষার সাথে সম্পৃক্ত শিক্ষক-গবেষক-বিশেষজ্ঞদের মতামত নিয়ে জাতীয় ঐকমত্যের ভিত্তিতে অবিলম্বে জাতীয় শিক্ষানীতি প্রণয়ন করার প্রচেষ্টা চালাবে, যাতে করে সরকার বদলের সাথে সাথে শিক্ষা নীতি বদলের পুরাতন নোংরা রাজনীতির পুনরাবৃত্তি না ঘটে।

### □ যুদ্ধাপরাধের বিচার

জাসদ সরকার গঠনে ভূমিকা রাখলে ১৯৭১ সালে জাতির ওপর পরিচালিত যুদ্ধাপরাধ-গণহত্যা-গণধর্ষণের ঘটনার তদন্ত এবং যুদ্ধাপরাধীদের চিহ্নিত করার জন্য একটি কমিশন গঠন এবং ১৯৭৩

সালের আন্তর্জাতিক যুদ্ধাপরাধ আইন অনুযায়ী যুদ্ধাপরাধীদের বিচারের জন্য বিশেষ ট্রাইব্যুনাল গঠনের প্রচেষ্টা চালাবে।

জাতীয় সমাজতান্ত্রিক দল-জাসদ সরকার গঠনে ভূমিকা রাখলে অগ্রাধিকার ভিত্তিতে উল্লেখিত বিষয়ে নীতিনিষ্ঠ অবস্থান থেকে সরকারের ভিতরে নীতি নির্ধারণ ও বাস্তবায়নে সর্বাত্মক প্রচেষ্টা চালাবে। এর পাশাপাশি দল থেকে নির্বাচিত সংসদ সদস্যগণ সংসদের ভিতরে ধারাবাহিকভাবে নিম্নের বিষয়গুলোতেও সোচ্চার ভূমিকা পালন করবে এবং রাষ্ট্রীয় নীতি নির্ধারণে ভূমিকা রাখার প্রচেষ্টা চালাবে।

### □ রাষ্ট্রীয় মূল নীতি অনুসরণ

সরকার পরিচালনার সকল ক্ষেত্রে মুক্তিযুদ্ধের চেতনা তথা ১৯৭২ সালের সংবিধানে বিধৃত মূল রাষ্ট্রীয় চার নীতি গণতন্ত্র, সমাজতন্ত্র, ধর্মনিরপেক্ষতা ও জাতীয়তাবাদ অনুসরণ করা, তথাকথিত মুক্তবাজারের হাতে দেশ ও জনগণের ভাগ্য ছেড়ে না দিয়ে জাতীয় স্বার্থ ও জনগণের স্বার্থকে প্রাধান্য দিয়ে ‘পরিকল্পিত জাতীয় অর্থনীতি’ এবং ‘সামাজিক অর্থনীতি’ অনুসরণ করা। মৌলিক মানবাধিকারবিরোধী সকল কালাকানুন বাতিল করা।

### □ সংসদ ও নির্বাচন পদ্ধতি সংস্কার

বর্তমান এক কক্ষবিশিষ্ট সংসদের বদলে শ্রমজীবী-কর্মজীবী-পেশাজীবী-নারী-ক্ষুদ্র জাতিসত্তা-আদিবাসী-স্থানীয় সরকারের প্রতিনিধি নিয়ে সংসদে উচ্চকক্ষ গঠন করে দ্বিকক্ষবিশিষ্ট সংসদীয় ব্যবস্থা চালু। বর্তমান সংসদ গঠনের জন্য অঞ্চলভিত্তিক প্রতিনিধিত্বের বদলে সংখ্যানুপাতিক পদ্ধতি চালু।

### □ কর্মসংস্থান

গ্রাম-শহর, শিক্ষিত-নিরক্ষর, দক্ষ-অদক্ষ নির্বিশেষে সকল কর্মক্ষম নাগরিকের তালিকা প্রণয়ন ও তাদের রেজিস্ট্রেশন কার্ড প্রদান করা, প্রতি পরিবারে কমপক্ষে একজনের জন্য বছরে অন্তত ১০০ দিনের নিশ্চয়তাসহ কাজের ব্যবস্থা করা। বিদেশে কর্মসংস্থানের জন্য প্রশিক্ষণ ও অর্থায়ন করা এবং বিদেশে শ্রমবাজার সৃষ্টির জন্য বিশেষ কূটনৈতিক উদ্যোগ গ্রহণ করা। কর্মসংস্থান কমিশন গঠন করা।

বিদেশ থেকে মূল্যবান বৈদেশিক মুদ্রা উপার্জনকারী প্রবাসীদের কর্মস্থলে অধিকার ও মর্যাদা নিশ্চিত করার জন্য প্রয়োজনীয় কূটনৈতিক উদ্যোগ গ্রহণ করা, প্রবাসীদের দেশে বিনিয়োগের ক্ষেত্রে বিশেষ সুবিধা প্রদান করা, প্রবাসীদের দেশে আসা যাওয়ার পথে বন্দরে এবং এলাকায় বিশেষ মর্যাদা ও নিরাপত্তা প্রদান করা।

### □ নারী সমাজের উন্নয়ন

নারীর প্রতি বৈষম্যমূলক সকল আইন বাতিল করা, ১৯৯৭ সালের নারী উন্নয়ন নীতিমালা বাস্তবায়ন করা, জাতীয় সংসদে ৩৩% ভাগ আসন নারীদের জন্য সংরক্ষণ ও সরাসরি নির্বাচন অনুষ্ঠান, স্থানীয় সরকার সংস্থায় ৩৩% ভাগ প্রতিনিধিত্ব নারীদের জন্য সংরক্ষণ, রাজনৈতিক দল, ট্রেড ইউনিয়নসহ সকল প্রতিনিধিত্বশীল সংস্থায় ৩৩% ভাগ প্রতিনিধিত্ব নারীদের জন্য সংরক্ষণ, কর্মজীবী নারীদের জন্য সবেতন ৪ মাস মাতৃত্বকালীন ছুটি, সম কাজে নারী-পুরুষ সমান মজুরি চালু।

### □ ধর্মীয়, জাতিগত সংখ্যালঘু ও আদিবাসীদের অধিকার

ধর্মীয় ও জাতিগত কারণে নাগরিকদের মধ্যে সকল ধরনের বৈষম্যের অবসান করা, শত্রু সম্পত্তি আইন বাতিল করা, পার্বত্য চট্টগ্রাম শান্তি চুক্তি পরিপূর্ণ বাস্তবায়ন করা, সমতলের আদিবাসী ও জাতিগত

সংখ্যালঘুদের ভূমির ওপর ঐতিহ্যবাহী অধিকার নিশ্চিত করার জন্য ল্যান্ড কমিশন গঠন, ক্ষুদ্র জাতিসত্তার সাংবিধানিক স্বীকৃতি প্রদান করা।

### □ ধর্মীয় স্বাধীনতা ও সম্প্রীতি

সকল নাগরিকের নির্ভয়ে শান্তিতে ধর্ম পালনের অধিকার নিশ্চিত করা। মসজিদ-মন্দির-গির্জা-প্যাগোডাসহ সকল ধর্মীয় স্থানে রাজনৈতিক কর্মকাণ্ড নিষিদ্ধ করে ধর্মীয় উপসনালয়ের পবিত্রতা ও শান্তি নিশ্চিত করা, ধর্মকে রাজনৈতিক হাতিয়ার হিসাবে ব্যবহার বন্ধ করা, সকল ধর্মের মানুষদের মধ্যে সম্প্রীতি ও শান্তিপূর্ণ সহ-অবস্থান বজায় রাখা। ধর্মভিত্তিক রাজনীতি, সাম্প্রদায়িকতা, ফতোয়াবাজি নিষিদ্ধ করা।

### □ সামষ্টিক অর্থনীতি

জাতীয় উৎপাদিকা শক্তির বিকাশ জাতীয় অর্থনীতির প্রধান লক্ষ্য হিসাবে নির্ধারণ করা। ব্যক্তি-সমাজ-বাজার-রাষ্ট্রের সমন্বয় ও পরিকল্পনার আওতায় কাঠামোগত অন্যায্যতা দূর করার দীর্ঘমেয়াদি কর্মসূচির ভিত্তিতে জাতীয় মালিকানায় পঞ্চবার্ষিক পরিকল্পনা পুনরায় চালু করা। বিদেশি ঋণ ও ঋণসহায়তা গ্রহণ ও ব্যবহার, বরাদ্দ ও ব্যয় এবং সুদ ও পরিশোধ বিষয়ে জাতীয় কমিশন গঠন করা। জনগণকে অবহিত না করে এবং জাতীয় সংসদে আলোচনা না করে বাণিজ্য ও বিনিয়োগ বিষয়ে কোন আন্তর্জাতিক চুক্তি না করা। জাতীয় অর্থনীতিতে রাষ্ট্রীয়ত্ত্ব খাতের অবদানকে স্বীকৃতি দেয়া এবং রাষ্ট্রীয়ত্ত্ব শিল্প ও সেবা খাতকে দক্ষ ও প্রতিযোগিতামূলকভাবে পরিচালনা করা। অবাধ আমদানি নীতি ও অনুৎপাদনশীল খাতে ব্যয় কঠোরভাবে বন্ধ করা। অপ্রতিষ্ঠানিক ক্ষেত্রের অর্থায়ন, প্রযুক্তি সহায়তা ও আধুনিকায়নের জন্য কমিশন গঠন করা।

### □ বন্দর ও যোগাযোগ অবকাঠামো

চট্টগ্রাম বন্দরের কার্যক্ষমতার সম্প্রসারণ ও আধুনিকায়ন করা, মংলা বন্দরকে সচল ও সম্প্রসারিত করা, ঢাকা-চট্টগ্রাম মহাসড়ক যোগাযোগ সম্প্রসারিত ও আধুনিক করা, ট্রান্স এশিয়ান সড়ক নেটওয়ার্কের সাথে বাংলাদেশকে যুক্ত করা, পদ্মা সেতু নির্মাণ কাজ শুরু করা।

### □ কৃষি ও গ্রামীণ অর্থনীতি

গ্রামীণ অর্থনীতি, কৃষি ও অকৃষি খাতের বিকাশ এবং কর্মসংস্থান তৈরির বিশেষ রাষ্ট্রীয় উদ্যোগ গ্রহণ করা। ক্ষুদ্র ও মাঝারি কৃষকদের বাজার অভিজ্ঞতা ও উৎপাদিত পণ্যের ন্যায্য মূল্য নিশ্চিত করতে তাদের ‘বাজারজাতকরণ সমবায়’ গড়ে তোলার লক্ষ্যে কার্যকর নীতি প্রণয়ন ও সর্বোচ্চ পুঁজি-প্রযুক্তি সহায়তা দেয়া। সার-বীজ-ডিজেলসহ কৃষি উপকরণ ও যন্ত্রপাতি ন্যায্যমূল্যে প্রাপ্তি নিশ্চিত করা। জেলে ও কৃষকদের স্বার্থে বাজার-হাট-মাঠ-ঘাট-হাওর-বাঁওড়-খাল-বিল-নালা ইজারা দেয়া সম্পূর্ণভাবে নিষিদ্ধ করা। ক্ষুদ্র ও কুটির শিল্পে সহায়তা ও বাজার প্রবেশাধিকারে কার্যকর উদ্যোগ নেয়া। সবজি-ফল-ফুল এবং পোলট্রি-ডেইরি-ফিশারি খাত সংরক্ষণমূলক পদক্ষেপের আওতায় নিয়ে আসা এবং রপ্তানিতে সহযোগিতা করা। মোট কৃষি উৎপাদনের মূল্যের ১০% কৃষিতে ভর্তুকি দেয়া। কৃষিপণ্য রপ্তানিতে ৩০% সহায়তা দেয়া। পল্লী ব্যাংক প্রথা চালু করা।

### □ জাতীয় শিল্প

ম্যানুফ্যাকচারিংসহ ক্ষুদ্র-মাঝারি ও বিকাশমান শিল্প, কৃষিভিত্তিক শিল্পসহ দেশজ মালিকানাকে ব্যাপক সংরক্ষণমূলক পদক্ষেপের আওতায় নিয়ে আসা। আমদানি শুল্ক বাড়ানো এবং ভবিষ্যতে আমদানি শুল্ক

আরো বাড়ানোর জন্য সরকারের স্বাধীনতা বজায় রাখতে বিশ্ব বাণিজ্য সংস্থায় কার্যকর উদ্যোগ নেয়া। দেশজ মালিকানার শিল্প সংরক্ষণে ঋণ ও অবকাঠামো সুবিধা এবং কাঁচামাল আমদানিতে সুবিধা দেয়া। বিশ্বের বাজারে শুষ্ক ও কোটামুক্ত প্রবেশাধিকার নিশ্চিত করতে সরকারের কার্যকর উদ্যোগ নেয়া। কর্মসংস্থান, অভ্যন্তরীণ পণ্য ও সেবার ব্যবহার ও ব্যালেন্স অব পেমেণ্ট দেশের অনুকূলে রাখার শর্তে বিদেশি বিনিয়োগের অনুকূল পরিবেশ তৈরি করা। বিদেশি বিনিয়োগকে অভ্যন্তরীণ নজরদারির আওতায় নিয়ে আসা। দেশজ টেক্সটাইল শিল্পের বিকাশে এবং গার্মেন্টস খাতের অগ্র-পশ্চাৎ শিল্প গড়ে তোলায় সহায়তা দেয়া, গ্রামীণ তাঁত শিল্পকে রপ্তানিমুখী পোশাক শিল্পের সাথে সম্পৃক্ত করা। চিনি ও পাট শিল্প পুনরুদ্ধার করা। পাট কমিশন গঠন করা ও বাজেটে বিশেষ থোক বরাদ্দ দেয়া। ক্ষুদ্র ও মাঝারি শিল্পের জন্য ন্যূনতম ৫০০০ কোটি টাকার শিল্পায়ন তহবিল গঠন করা এবং যতদিন বিকল্প অর্থায়ন নিশ্চিত না হয় ততদিন তা ১০% হারে বাড়ানো। শিল্প ঋণের সুদের হার বাংলাদেশ ব্যাংককে দেয় সুদের হারের ২%-এর বেশি না করা এবং কোনক্রমেই মোট ৮%-এর বেশি না করা।

### □ সেবা খাত

শিক্ষা-চিকিৎসা-পানির মতো মৌলিক সেবা খাত থেকে রাষ্ট্রের হাত গুটিয়ে নেয়ার নীতি পরিহার করা। বাংলাদেশের সেবা খাতকে অর্থনীতির প্রধানতম, বিকাশমান ও সম্ভাবনাময় খাত হিসেবে বিশেষ গুরুত্ব প্রদান করে একে সংরক্ষণমূলক পদক্ষেপের আওতায় নিয়ে আসা। সেবা খাতে অতীত উদারীকরণের মূল্যায়ন না করে বিশ্ব বাণিজ্য সংস্থা ও বিশ্বব্যাংক-আইএমএফ-এর পরামর্শে নির্বিচার উদারীকরণ বন্ধ করা। স্বল্পদক্ষ ও আধাদক্ষ শ্রমিকের বিশ্বব্যাপী কাজের অধিকার নিশ্চিত করতে বিশ্ব বাণিজ্য সংস্থায় কার্যকর উদ্যোগ নেয়া। বিতরণ, পানি, নির্মাণ, তথ্যপ্রযুক্তি, হোটেল রেস্টুরেন্ট, পর্যটন, স্বাস্থ্য, বন্দর, গ্যাসসহ পৌরসেবা ও মৌলিক পরিষেবা বিদেশি কোম্পানির জন্য কোনক্রমেই উদার না করা।

### □ শ্রমিক ও নারী শ্রমিক

শহর-গ্রাম, কৃষি-শিল্প-সেবা, প্রাতিষ্ঠানিক-অপ্রাতিষ্ঠানিক, নারী-পুরুষ, সরকারি-বেসরকারি-ইপিজেড নির্বিশেষে সকল ক্ষেত্রের শ্রমিকের শ্রমিক হিসাবে রেজিস্ট্রেশন করা এবং ট্রেড ইউনিয়ন অধিকার নিশ্চিত করা, ন্যূনতম জাতীয় মজুরি চালু করা। অপ্রাতিষ্ঠানিক ও কৃষি ক্ষেত্রে শ্রম আইন চালু করা। নারী শ্রমিকের সমকাজে সমমজুরি, মাতৃত্বকালীন ছুটি, নিরাপদ কর্মপরিবেশ নিশ্চিত করা।

### □ হতদরিদ্র, নগর দরিদ্র ও বস্তিবাসী, গ্রামীণ ভূমিহীন ও বাস্তুহারা

বস্তিবাসীর রেজিস্ট্রেশন করা, পুনর্বাসন ব্যতিরেকে হকার-বস্তি উচ্ছেদ না করা, বস্তিবাসীর জন্য মৌলিক পরিষেবা নিশ্চিত করা, আবাসন প্রকল্প চালু করা। গ্রামীণ ভূমিহীন ও বাস্তুহারাদের খাস জমিতে পুনর্বাসন করা। হতদরিদ্রদের জন্য সকল ব্যাংকের মোট আমানতের ৫% দারিদ্র্য বিমোচন কর্মসূচিতে বাধ্যতামূলকভাবে বিনিয়োগ করা। দুর্যোগ তহবিল গঠন করা।

### □ প্রতিবন্ধীদের অধিকার

পরিবার-সমাজ-রাষ্ট্রের কোন ক্ষেত্রেই প্রতিবন্ধীরা যেন কোন ধরনের অবহেলা-বৈষম্যের শিকার না হয় তার জন্য প্রতিবন্ধীদের অধিকার সংরক্ষণে আইন প্রণয়ন ও বাস্তবায়ন এবং রাষ্ট্রের পক্ষ থেকে প্রতিবন্ধীদের সমর্থন প্রদান।

### □ জনস্বাস্থ্য ও জনসংখ্যা

সকল নাগরিকের জন্য স্বল্পমূল্যে স্বাস্থ্য কার্ড প্রদান করে সকল পর্যায়ের সরকারি হাসপাতালে চিকিৎসা সুযোগ নিশ্চিত করা। উপজেলা হেলথ কমপ্লেক্স ও ইউনিয়ন পর্যায়ে স্বাস্থ্য কেন্দ্রগুলোতে চিকিৎসা সেবা নিশ্চিত সহজলভ্য করা। জনসংখ্যা বৃদ্ধির হারকে কমিয়ে নেতিবাচক হারে আনার জন্য পরিবার পরিকল্পনা কার্যক্রম আরো সম্প্রসারিত করাসহ প্রয়োজনীয় ব্যবস্থা গ্রহণ করা। জাতীয় ঐকমত্যের ভিত্তিতে জাতীয় স্বাস্থ্যনীতি প্রণয়ন করা যেন সরকার বদলের সাথে সাথে স্বাস্থ্য নীতি বদলের পুরাতন নোংরা রাজনীতির পুনরাবৃত্তি না ঘটে।

### □ ভূমি ব্যবহার ও ব্যবস্থাপনা

ভূমি সংস্কার এবং ভূমির সর্বোচ্চ ব্যবহার নিশ্চিত করতে গ্রাম ও শহরের জন্য ভূমি ব্যবহার নীতি প্রণয়ন করা। ভূমি কমিশন গঠন করা। খাস জমি, সিলিং উদ্বৃত্ত জমি, বেদখলকৃত জমি রাষ্ট্রের নিয়ন্ত্রণে নিয়ে আসা। কোন জমি বিদেশি কোম্পানির কাছে স্থায়ী হস্তান্তর নিষিদ্ধ করা। বাজার-হাট-মাঠ-ঘাট-হাওর-বাঁওড়-খাল-বিল-নালা ইজারা দেয়া সম্পূর্ণভাবে নিষিদ্ধ করা। ভূমি প্রশাসন সংস্কার করা। ভূমি সংক্রান্ত আইনগত সমস্যা নিরসনে বিশেষ আদালত গঠন করা।

### □ পরিবেশ, প্রকৃতি ও জলবায়ু পরিবর্তন

প্রাণবৈচিত্র্য, পরিবেশ, প্রকৃতি ও প্রাকৃতিক প্রক্রিয়া বিরোধী সকল কার্যক্রম কঠোরভাবে বন্ধ করা। অবকাঠামোসহ যে কোন উন্নয়ন প্রকল্প গ্রহণ ও বাস্তবায়নে স্থানীয় ও লোকজ জ্ঞানের ব্যবহার এবং স্থানীয় জনগণের অংশগ্রহণ নিশ্চিত করা। জলবায়ু পরিবর্তনজনিত ক্ষয়ক্ষতি মোকাবেলায় জাতীয় নীতি প্রণয়ন করা।

### □ পানি সম্পদ

নদ-নদী, খাল-বিল, হাওর-বাঁওড় সংরক্ষণে কার্যকর উদ্যোগ নেয়া। অগ্রাধিকার ভিত্তিতে পদ্মা বহুমুখী বাঁধ, কালনী-কুশিয়ারা প্রকল্প ও উপকূলীয় বাঁধ পুনর্বাসন প্রকল্প চালু করা। ভারত থেকে বাংলাদেশের মধ্যে প্রবাহিত ৫৪টি আন্তর্জাতিক নদ-নদীর পানি প্রবাহ ও বন্টনে বাংলাদেশের অংশীদারিত্ব নিশ্চিত করা এবং ভারতের আন্তঃনদী সংযোগ প্রকল্প ও টিপাইমুখ বাঁধ স্থগিত করতে কূটনৈতিক উদ্যোগ নেয়াসহ দক্ষিণ হিমালয় অঞ্চলে যৌথ পানি সম্পদ ব্যবহার, পরিবেশ-প্রকৃতি রক্ষায় বহুপাক্ষিক উদ্যোগ গ্রহণ করা।

### □ গ্যাস-কয়লাসহ জাতীয় সম্পদ

গ্যাস ও কয়লাসহ খনিজ সম্পদ এবং সামুদ্রিক ও উপকূলীয় সম্পদের ওপর জাতীয় মালিকানা নিশ্চিত করা। গ্যাস-কয়লাসহ অনুসন্ধান-উত্তোলন-বিপণনের ক্ষেত্রে বিদেশি কোম্পানির সাথে সম্পাদিত জাতীয় স্বার্থ বিরোধী সকল অসম গোপন উৎপাদন-বন্টন চুক্তি বাতিল করা। ইউনোকল ও নাইকোর কাছ থেকে ক্ষতিপূরণ আদায় করা।

### □ জাতীয় নিরাপত্তা

জাতীয় সংসদে আলোচনা এবং বিভিন্ন পর্যায়ের জনগণের অংশগ্রহণ ও আলোচনার মাধ্যমে সমন্বিত জাতীয় প্রতিরক্ষা নীতি প্রণয়ন করা। ১৮ বছরের উর্ধ্বে সকল নাগরিককে বাধ্যতামূলক সামরিক প্রশিক্ষণ প্রদান করা।

### □ পররাষ্ট্র নীতি ও আন্তর্জাতিক-আঞ্চলিক-উপআঞ্চলিক সহযোগিতা

জাতীয় স্বার্থ, নিরাপত্তা, মর্যাদা ও সার্বভৌমত্ব রক্ষা করে সকল দেশের সাথে সহযোগিতা ও বন্ধুত্বের সম্পর্ক গড়ে তোলা। ভারতের সাথে ঝুলে থাকা দ্বিপাক্ষিক সমস্যার সমাধানে কার্যকর উদ্যোগ গ্রহণ করা। সার্ক কার্যকর করা। উপমহাদেশীয় যৌথ আঞ্চলিক নিরাপত্তা-কাঠামো গঠনের উদ্যোগ নেয়া; এক দেশ কর্তৃক অন্য দেশের বিক্ষুব্ধ জনগোষ্ঠীকে পৃষ্ঠপোষকতা না করা, অগ্রযাত্রার পথে ঝুলে থাকা অতীতকে বিয়ুক্ত করা ও সাম্প্রদায়িকতা বর্জন করা। সমতা ও মর্যাদার ভিত্তিতে এবং সামরিক কাজে ব্যবহার না করার শর্তে আন্তর্জাতিক বিধান অনুসারে বহুপাক্ষিক যোগাযোগ ব্যবস্থা পরস্পরের জন্য উন্মুক্ত করা। পারমাণবিক প্রতিযোগিতা বন্ধ করা। বিশ্ব বাণিজ্য পরিসরে স্বল্পোন্নত দেশগুলোর অভিন্ন স্বার্থে যৌথ উদ্যোগ গ্রহণ ও দরকষাকষি করা।

## □ মুক্তিযুদ্ধ ও মুক্তিযোদ্ধা

মুক্তিযুদ্ধের মীমাংসিত বিষয়কে অমীমাংসিত না করা ও ঐতিহাসিক সত্যকে বিকৃত ও অস্বীকার না করা, মুক্তিযুদ্ধে যার যা অবদান তার স্বীকৃতি ও সম্মান প্রদর্শন করা, মুক্তিযোদ্ধাদের জাতীয় বীরের মর্যাদাসহ রাষ্ট্রীয়, সামাজিক, আর্থিক মর্যাদা সুনিশ্চিত করা, মুক্তিযোদ্ধাদের সম্মানী ভাতার পরিমাণ বৃদ্ধি করা, মুক্তিযুদ্ধের শহীদ-শহীদ পরিবার-মুক্তিযুদ্ধে ক্ষতিগ্রস্ত নারীদের তালিকা প্রণয়ন করা এবং তাদের যথাযথ রাষ্ট্রীয় সম্মান প্রদান করা।

প্রিয় দেশবাসী,

জাতীয় সমাজতান্ত্রিক দল-জাসদ আগামী নির্বাচনে উল্লেখিত ইশতেহার ও অঙ্গীকারের প্রতি আপনাদের সমর্থন প্রত্যাশা করছে। জনগণের ভোটে জাসদ মনোনীত প্রার্থীরা বিজয়ী হলে উল্লেখিত ইশতেহার ও অঙ্গীকারের ভিত্তিতে সরকারের ভিতরে ও বাইরে, সংসদের ভিতরে ও বাইরে নীতিনির্ধারণে ভূমিকা রাখার জন্য পরিবর্তনের প্রচেষ্টা চালাবে এবং ঐক্য সংগ্রাম-ঐক্য নীতির ভিত্তিতে গণআন্দোলন গড়ে তুলবে।

জাতীয় সমাজতান্ত্রিক দল-জাসদ

৩৫-৩৬, বঙ্গবন্ধু এভিনিউ, ঢাকা-১০০০।

ফোন+ফ্যাক্স: ৯৫৫৯৯৭২

১৫ ডিসেম্বর ২০০৮